

Bienq Ndei

□ Cungh Hihcwngh/钟希增

Dahmingz ndaej senj guh cunhvej fucujyin lo. Luz Hozcaiz Mbanjgoren gig yawj mbouj gvaq da, bi gyaeuj laglag. Geijlai seizdaih roengzdaeuj, cungj dwg senj nyaenh boux miz sawmaeg miz dungxcaiz daeuj guh cunghanbu, vihmaz aen seizdaih moq neix lij senj yungh boux doeg mbouj baenz saw? Aen biengz dauqdaej bienq ndei roxnaeuz bienq rwix lo? De ngeizvaeg lo, gag ngon gag naeuz:

“Bouxgvai cungj vit hoengq,
Dauqfanj yungh ‘vunzngawz’,
Ngh swt mbouj ngah gaw,
Geiz mbouj saw cix gvaig.”

Dahmingz dwg lwgsau Mbanj-nazgut lwgbawx Mbanjgoren, doenghbaez Luz Hozcaiz bae Nazgut guh lauxsae, ndaej son dahde gvaq. Mwhde, Dahmingz mbouj gyaeg doegsaw, lauxsae hwnjdangz cungj dingq mbouj haeujrwz, cingzciq yaez dangqmaz!

Raemx hwnj raemx roengz, va hoengq va loenq, doeklaeng Luz Hozcaiz bienqbaenz boux vunz laj-mbanj bae Gvangjdungh dajgoeng. Miz baez ndeu, lauxbanj cingj Luz Hozcaiz bang gunghyinz haenx bae bouqlaeuj gwn ngaiz, song dah fuzvuyenz daeuj bang caem laeuj, dahdah daz ndaej naj hau bak nding, daenj buh roh ndaw roh aek.

“Lauxbanj, lij aeu maz fugsae h lwi?” Dah ndeu niuj caekhaex bungq gvaqdaeuj naeuz.

Luz Hozcaiz baez yawj dahde, seizneix dahde hix yawj coh Luz Hozcaiz, seiq ceh lwgda doxcim, dahde doeksaet yat, fwtfat baenq naj byaij deuz. Luz Hozcaiz raen dahde miz di najsug, cix ngeix mbouj hwnj youq gizlawz raen gvaq. Doeklaeng fwt singjsag gvaqdaeuj, dwg Dahmingz! Nanzlai mbouj raen, dahde maj baenz sau lo.

Dahmingz guhlawz bienqbaenz cungj vunz neix ne? Luz Hozcaiz simget raixcaix, haemhaenx de fonj bae fonj dauq baenz hwnz ninz mbouj ndaek.

Haet daihngaih Luz Hozcaiz cinggyaj bae aen bouqlaeuj haenx ra Dahmingz, siengj bae gienq de gaej guh gij saeh yahcienh coujnaj couj ndaeng haenx, Hoeng Luz Hozcaiz bae daengz bouqlaeuj cam, boux cawjguen bouqlaeuj naeuz dahde haemhlwenz senq deuz lo, mbouj rox bae gyawz, denva hix dwk mbouj doeng.

Byaibi dauq ranz gvaq cieng, Luz Hozcaiz daegdaengq bae ra Dahmingz. Dauqcungz ndaem haeuj Mbanj-nazgut, Mbanjnazgut caemh caeuj mbanj wnq doxdoengz liux bae, yienghyiengh bienq ndei, diuz daihloh bingzrwd sohsup doeng haeuj mbanj, lohdaeng daiyangznwngz song henz baiz ndaej cingjingj caezcaez, laeuz ndaw mbanj doenghdoengh sang-sadsad, ciengz hau vax loeg, gyaqciq raixcaix. Aen ranz gaeuj Dahmingz henz daemz haenx hix bienqbaenz doengh laeuz seiq caengz ronghsag ndeu. Luz Hozcaiz byaij haeuj ranz bae, dingjingz boh Dahmingz meh Dahmingz cungj youq naj densi ciengq go. Raen Luz Hozcaiz daeuj, song gyaeujyah sikhaek heuh haeuj ranz daeuj gwn caz, lij yaek bae laeng hongh gaeb gaeq, cawj ngaiz dakdaih. Luz Hozcaiz naeuz daeuj ra Dahmingz, meh Dahmingz naeuz dahlwg de mbouj dauq ranz gvaq cieng, gangj-byoegbyoeg naeuz Dahmingz doeg cuhcungh caengz sat couh riengz vunz bae Gvangjdungh guhhong lo, bibi cungj geiq daihbaj ngaenz dauqma hawj bouxlaux. De sim’ angq riu dwk da laep da liuq, lij eu naeuz: “Dahlwg gou caen gvai, laeuj cienz lai gvaq doih, yienznaeuz doegsaw noix, hix daep soij daep gim.”

Luz Hozcaiz naeuz mbouj gwn ngaiz lo, de cigsoh lwnh raen Dahmingz youq Gvangjdungh baenz-lawz yiengh hawj bohme h Dahmingz nyi. Siengj gienq Dahmingz gaij guh hong cingqdanq, naeuz de ndaej bang Dahmingz cam lauxbanj hawj Dahmingz bae aen gunghsw h de guhhong. Boh Dahmingz dingq le najfonx mbouj guhsing, meh Dahmingz fwngz yeix najbyak Luz Hozcaiz rongx naeuz: “Mwngz luenh gangj, dahlwg gou mbouj dwg cungj vunz haenx, mwngz nyinh loek vunz lo, mwngz caiq luenh gangj vaih mingzdaeuz lwg gou, gou couh sik bak mwngz gvag daengz goekrwz bae!” Hwk dwk Luz Hozcaiz buet deuz mbouj gib.

Guekgya hengzgah aen canloz saenqhwnq lajmbanj le, gij diuzgen lajmbanj ndaej bienq ndei, Luz Hozcaiz lumj ciencien fanhfanh vunz lajmbanj haeuj singz guhhong haenx ityiengh, dauqma mbanjranz cauxnieb, haenqrengz caux ngoenz moq.

Luz Hozcaiz ngamq dauqma moengq de, cingqngamj roeb dawz lajmbanj cunhminz siujcuj gaijsen vuenh bouxdaeuz, gyoengqvunz ndaw

cuj raen de uk gvai rox naemjciek couh doxcanj senj de, couh yienghneix de baenz le Mbanjgoren daihngaih cunhminz siujcujcangj.

Gunghozgoz laebbaenz caetciq hopbi ngoenzde, baihgwnz iugouz cunhvej comz gyoengq cunhminz daiyauj caeuj siujcujcangj gak mbanj daeuj swng geizguek, gikfat gyoengqvunz yiedcingz gyaegzguek, lai roxnyinh Cunghvaz Minzcuz miznaj.

Ndaw hongh cunhvej, gyoengq cunghanbu, cunhminz daiyauj, siujcujcangj baizdaih sohrwd youq laj geizganj, boux minzbingh lenzcangj dinfwngz riengjret cug cag haeuj mbaw geizhoengz hajsing moq. Cunchisuh sing sang hemq naeuz: “Yaep he swnggeiz daihgya aeu oksing ciengq gozgoz bw!”

“Ciengq diuz gozgoz lawz?” Dahmingz fucujyin fwt cam, lumj boux siujhagseng gyaeg cam vwndiz nei.

“Swng geizguek haengjdingh dwg ciengq gozgoz ha, lij cam ciengq diuz lawz?” Cihuh lumj miz di mbouj naihfanz.

“Baenzlai gozgoz, rox heuh ciengq diuz lawz?” Mbouj liuh Dahmingz lij cam coenz ndeu, haujlai vunz nyaenx mbouj ndaej yaek goemq bak riu.

Boux doengzsae ndwn henzrik de laeglemx beng genbuh de sing saeq naeuz: “Gozgoz guek raeuz dwg 《Yiyungjinh Cinhingzgez》.”

“O, laxlawz dwg ceijdingh diuzgo ndeu ha? Mwngz mbouj gangj gou lij laihaeuz gozgoz dwg go gozyij ne.”

Luz Hozcaiz dinghdingh soengz-ndwn dwk, riu mbouj ndaej daej mbouj baenz, de gaxgonq guhlawz son ndaej ok boux hagseng yienghneix ne, de haemz ha, haemz diet mbouj baenz gang!

Vihliux sawj ndwenngoengz bienq ndei, Luz Hozcaiz naemj guh fan daih saehnieb ndeu. De yawj hwnj le Luegguk giz dieg liz mbanj gyaegyanggyang haenx, gizhaenx ndoi sang bo lingq, soqlaiz mboujdaih miz vunz bae. Luz Hozcaiz naemj bau roengzdaeuj guh lizdij dajndaem dajciengx, gwnz ndoi ndaem faex, laj faex ciengx gaeq, ndaw lueg haep daemz ciengx bya, gwnz raemx ciengx bit. Gangj guh couh guh, de bae gizhaenx dap diengz youq, lij yaek daj ndaw mbanj rag dien h bae dem.

Ngoenzhaenx de bae ra cunhvej hai cwnghmingz, cingjgouz denliz gunghsw h daeuj bang cang dien h,

cunhvej dwg Dahmingz cizbanh.

“Luz lauxsae!”

“W, cihuh cujyin mbouj youq ha?” Luz Hozcaiz raen ndaw ranz-banhgoeng gag Dahmingz bouxdog youq, cam.

“O, gyoengqde cungj roengz-mbanj lo.”

“Gyoengqde mwhlawz cij dauq ne?” Luz Hozcaiz miz di simgip, de mbouj siengj hawj Dahmingz hai cwnghmingz, lau de raiz loeng ngu h gij saeh de. Doenghbaez Luz Hozcaiz son Dahmingz yijvwnz, Dahmingz miz geijlai haexnyouh de cungj rox, mbouj gangj naeuz raiz cozvwnz lo, couh lienz cujszw cauhgawq, cungj guh mbouj baenz.

“Lauheiq daengz banhaemh cij ndaej dauq bw.”

Cingq youq seizneix, yah naihgq ndeu yamq haeuj ranzbanhgoeng daeuj, “daeglan gou doegsaw yaek cingjgouz aeu ngaenz boujdiep baihgwnz, hagdangz naeuz cunhvej ok cwnghmingz cijndaej, mwngz ndaej hai hawj gou lwi?” Yahnaih dwg vunz Mbanjdakdenz, caemh dwg daeuj hai cwnghmingz.

“O, ndaej, ndaej, dawz hugoujbu daeuj lwi?”

“Dawz ha, youq neix.” Yahnaih ndenq hugoujbu hawj Dahmingz.

Dahmingz cieq gvaq hugoujbu, naengh baihnaj dennau song fwngz dwk genbanz, mbouj daengz song faencung, aen dajyingih couh yaenq ndaej mbaw cwnghmingz ndeu ok-daeuj.

Luz Hozcaiz yawj ndaej da cungj byaengq liux, guh ndaej nyaenx vaiq? Yahnaih cieq mbaw cwnghmingz daeuj yawj, Luz Hozcaiz caemh youq bangxhenz yawj, cij raen mbaw cwnghmingz vahgawq mingzbeq, cih saw gveihfan, caen lumj boux vwnzyenz ciennieb dwk okdaeuj, de nyaenx mbouj ndaej haenx coenz ndeu naeuz: “Yu, mbatneix Dahmingz hai cwnghmingz sug lai bw!”

“Mbouj dwg gou sug, ndaw dennau miz aen mozbanj lo, cij aeu dienz di mingzcoh swliu haeujbae couh baenz.” Dahmingz riu naeuz: “Seizdaih mbouj doengz lo, biengz raeuz diuzgen bienq ndei lo, guh gijmaz cungj fuengbienh.”

Luz Hozcaiz naj nding lo, de roxnyinh mbouj yungh caiq caj boux cunghan wnq lo, naeuz: “Dahmingz, gou…… gou caemh aeu mbaw cwnghmingz ndeu.”

Aen ciengz dajndaem dajciengx Luz Hozcaiz guh baenz le, Luz Hozcaiz gag guhhong cungj nyaengq dwk muenxlueh bae, couh ciengzseiz cingj gyoengq vunzmbanj bae bang guh, gij ndwenngoengz caezgya cungj bienq ndei lo.

Ngoenzndaep, Luz Hozcaiz caeuj boux banghong ndeu daeh bit bae haw gai, ginggvaq bakgvaengh cunhvej, raen gaiq lanzsenhconz nem mbaw “bangjgvanghyungz” ndingfug ndeu, de mbouj ndaejhoengq bae yawj, couh cam boux banghong haenx dwg gijmaz, boux banghong naeuz: “Dwg cinfuj haenx boux cunghanbu maenhndei, Dahmingz caemh bingz hwnj bw!”